

BERHIBUR JANGAN SAMPAI TAHAP MELALAIKAN

Oleh: Nurliyana Afiqah binti Ahmad Khushairi, 1172672,
Fakulti Kepimpinan dan Pengurusan (FKP), Universiti Sains Islam Malaysia (USIM)
Disiarkan pada 18 Ogos 2020



Zaman kian berubah dan manusia sentiasa ingin mengikut perkembangan semasa. Zaman anak muda kini lebih mencabar kerana mereka hidup dalam dunia tanpa sempadan, di mana peranan media sosial menjadi semakin penting dalam menyebarkan dan menyampaikan maklumat.

Golongan generasi Y hidup dalam suasana serba moden dan menikmati hasil pembangunan negara. Pemikiran kelompok ini begitu kritis, inovatif dan banyak terdedah dengan nilai kehidupan global.

Anak muda sukar dapat dipisahkan dengan gajet yang begitu sinonim dengan fenomena media sosial yang berkembang pesat sejak akhir 1990-an dan awal abad ini.

Platform media sosial yang semakin banyak mula membeli jiwa dan fikiran anak-anak muda untuk terus menggunakan medium yang semakin canggih ini.

Trend dunia hiburan seperti K-pop, BTS, Tiktok berlumba-lumba masuk ke setiap pelosok medium alam maya untuk meraih minat anak muda.

Kajian menunjukkan 34 peratus dari jumlah pengguna Facebook di Malaysia adalah dalam kalangan generasi muda yang berumur antara 13 tahun hingga 24 tahun.

Mereka dihidang dan dilalakan dengan hiburan tanpa mengira siang atau malam di alam maya media sosial, televisyen, radio, akhbar dan majalah.

Oleh yang demikian, adakah wajar sekiranya kita menyalahkan perubahan masa dan kecanggihan teknologi?

Ramai yang menuding jari menyalahkan platform media sosial dan pelbagai aplikasi yang wujud. Walhal, manusia juga yang menyalahgunakan aplikasi tersebut kepada perkara-perkara yang tidak sepatutnya.

Kajian yang dijalankan oleh Onemyr Awareness Management terhadap 735 pelajar sekolah berusia 13 hingga 17 tahun di sekitar Selangor, Kuala Lumpur dan Perak mendapati 65 peratus daripada mereka mengaku pernah menyalahgunakan media sosial atau berbuat perkara yang tidak elok dalam media sosial.

Anak muda adalah golongan yang paling mudah terpengaruh dengan kecanggihan dan pembaharuan teknologi.

Sikap ingin mengikut trend mengakibatkan mereka lebih mudah terjebak dalam hiburan yang berleluasa.

Islam tidak pernah menyekat kita dari berhibur namun perlu dilakukan secara sederhana dan tidak keterlaluan sehingga sampai ke tahap melalaikan.

Islam meletakkan garis panduan untuk berhibur agar tidak melanggar syariat yang telah ditetapkan. Islam juga telah meletakkan panduan hiburan yang dibenarkan dan ditegah.

Kehancuran budaya dan agama akan terus berlaku sekiranya pengaruh luar terus mempengaruhi jiwa dan minda anak muda tanpa sekatan.

Jika generasi sekarang hanyut, maka bimbinglah mereka dengan kefahaman ilmu agama serta akhlak yang baik.

Buat anak muda, beringatlah dalam berhibur dan jangan biarkan diri anda terus hanyut dibuai hiburan. Anda adalah harapan bangsa dan negara.

